



JUDICIAL SYSTEM MONITORING PROGRAMME

PROGRAMA MONITORIZASAUN BA SISTEMA JUDISIÁRIU

*Komunikadu Imprensa*  
*Distritu Same*  
*7 Novembru 2016*

## **Komunidade Suku Tutuluro apresia atividade treinamentu hosi JSMP**

Iha 26 Otubru 2016, Judicial System Monitoring Programme (JSMP), fasilita treinamentu ba komunidade fetu no mane iha Suku Tutuluro, Postu Administrativu Same, Munisipiu Manufahi.

Treinamentu ne'e partisipa husi ema nain 30 ne'ebé kompostu husi komunidade fetu 20 no komunidade mane 10. Partisipante sira mai husi Aldeia Ailau, Dalun no Bubulau. Treinamentu ne'e ho objetivu atu hasa'e kuñesimentu komunidade injeral hodi enkoraja sira atu asesu ba sistema justisa formal.

“Treinamentu ne'e hanesan atividade sensibilizasaun kona-ba asuntu Lei Kontra Violénsia Domestika, direitu labarik no oinsa prosesu relasiona ho kazu ne'e atu kontribui hasae koñesimentu komunidade hodi enkoraja sira iha prevensaun, protesau iha sira nia moris lor-loron,” dehan Luis de Oliveira Sampaio, Diretór Ezekutivu JSMP.

Aleinde ne'e, JSMP mós introdus knaar Juis, Ministériu Públiku, Defensória Públiku, Advogadu Privadu no Polísia. Iha oportunidade ne'e, JSMP fahe informasaun ba komunidade sira wainhira sai vítima ba krime violénsia bazeia ba jéneru bele kontaktu organizasaun fetu sira atu bele fo assistensia asesu ba justisa formal.

Iha treinamentu ne'e, partisipante sira apresenta problema ne'ebé sira infrenta mak hanesan violénsia domestika, violasaun seksuál no kazu seluk ho natureza sivil hanesan poligamia (kaben ho fetu seluk), abandona no sira la hatene oinsa atu resolve tuir dalan justisa formal.

Adjunta Administradora postu Administrativu Same, Sra. Izabel da Costa, iha sesaun abertura apresia atividade treinamentu ne'ebé JSMP apresenta no informa ba komunidade sira katak treinamentu ne'e importante tebes tanba bele kontribui hodi dezenvolve sira nia koñesimentu.

Iha enseramentu Adjunta Administradora hato'o agradesementu wain ba JSMP no informa katak komunidade sira presija informasaun kona-ba funsionamentu sistema justisa formal, tanba ne'e suku Tutuluro pronto kolabora ho entidade hotu ne'ebé hakarak hala'o atividade iha suku refere tanba sira konsidera prezensa JSMP nian hanesan premeira-ves iha sira nia suku.

Aktividade ne'e realiza tanba hetan apoiu orsamentu husi Embaxada Canada iha Jakarta-Indonezia.

Atu hetan informasaun liutan bele kontaktu:

Luis de Oliveira Sampaio

Diretór Ezekutivu JSMP

Email : [luis@jsmp.minihub.org](mailto:luis@jsmp.minihub.org)